



李太白文集卷第二十五

古賦

學士贈右拾遺李

明堂賦 并序

大獵賦 并序

大鵬賦 并序

劍閣賦

擬恨賦

惜餘春賦

愁陽春賦

悲清秋賦

明堂賦 并序

昔在天皇告成岱宗改元乾封經始明堂年紀總章
時締構之未輯痛威靈之遐邁天后繼作中宗成之
因兆人之子來崇萬祀之丕業蓋天皇先天中宗奉
天累聖纂就鴻勳克宣臣白美頌恭惟述焉其辭曰



伊皇唐之革天創元也我高祖乃仗大順赫然雷發
以首之於是橫八荒漂九陽掃叛換開混茫景星耀
而太階平虹蜺滅而日月張欽若太宗繼明重光廓
區宇以立極綴蒼昊之頽網淳風沕穆鴻恩滂洋武
義烜赫於有截仁聲馭駮乎無疆若乃高宗紹興祐
統錫羨神休傍臻瑞物咸薦元符剖兮地珍見旣應
天以順人遂登封而降禪將欲考有洛崇明堂惟厥
功之未輯兮乘白雲於帝鄉天后勤勞輔政兮中宗
以欽明克昌遵先軌以繼作兮揚列聖之耿光則使
軒轅草圖羲和練日經之營之不綵不質因子來於
四方豈殫稅於萬室乃准水臬攢雲樑罄玉石於隴

坂空瓌材於瀟湘巧奪神鬼高窮昊蒼聽天語之察
察擬帝居之鏘鏘雖暫勞而永固兮始聖謨於我皇
觀夫明堂之宏壯也則突兀曠曠乍明乍蒙大古元
氣之結空龍從頽沓若鬼若業似天闔地門之開闔
爾乃劃崖嶺以嶽立郁穹崇而鴻紛冠百王而垂勳
燭萬像而騰文宰惚恍以洞啓呼嵌崑而傍分又比
乎崑山之天柱矗九霄而垂雲於是結構乎黃道岌
堯乎紫微絡勾陳以繚垣闔闔闔而啓扉崢嶸曾疑
粲宇宙兮光輝崔嵬赫奕張天地之神威夫其背汎
黃河垠瀨清洛太行却立通谷前廓遠則標熊耳以
作揭豁龍門以開關點翠綵於洪荒洞清陰乎羣山

及乎煙雲卷舒忽出乍沒岌嵩噴伊倚日薄月雷霆
之所鼓蕩星斗之所任托挈金龍之蟠蜿挂天珠之
肆矼勢拔五嶽形張四維軋地軸以盤根摩天倪而
創規樓臺岨岨以奔附城闕峯岑而蔽虧珍樹翠草
含華揚蕤目瑤井之熒熒拖玉繩之離離擷華蓋以
儻漭仰太微之叅差擁以禁扃橫以武庫獻房心以
開鑿瞻少陽而舉措採殷制酌夏步雜以代室重屋
之名括以辰次火木之數壯不及奢麗不及素層簷
屹其霞矯廣厦鬱以雲布掩日道遏風路陽烏轉影
而翻飛大鵬橫霄而側度近則萬木森下千宮對出
熠乎光碧之堂昂乎瓊華之室錦爛霞駁星錯波沕

颯蕭寥以颼颼宵陰鬱以櫛密含佳氣之青葱吐祥
煙之鬱律九室窈窕五闈聯綿飛楹磊砢走拱夤緣
雲楣立岌以橫綺綵楠攢藥而仰天皓壁畫卽朱蕤
晴鮮頰欄各落偃蹇霄漢翠楹迴合蟬聯汗漫沓蒼
穹之絕垠跨皇居之太半遠而望之赫煌煌以輝輝
忽天旋而雲昏迫而察之粲炳煥以照爛倏山訛而
晷換茂蓬壺之海樓吞岱宗之日觀猛虎失道潛蚪
蟠梯經通天而直上俯長河而下低玉女攀星於網
戶金娥納月於璇題藻井綵錯以舒蓬天窻施翼而
銜霓扶標川而罔足擬跟絰而罷躋要離欬矐而外
喪精視冰背而中迷亘以複道接乎宮掖空入西樓

寔爲崑崙前承後疑正儀躅以出入九夷五狄順方
面而來奔其左右也則丹陛嶢嶢形庭煌煌列寶鼎
敵金光流辟雍之滔滔像環海之湯湯闢青陽啓總
章廓明臺而布立堂儼以太廟處乎中央發號施令
采時順方其闔闔也三十六戶七十二牖度延列位
西八東九白虎列序而躡踞青龍承隅而蚴蟉其深
沉奧密也則赤燦掌火招拒司金靈威制陽叶光摧
陰坤斗主土據乎其心若乃熠燿五色張皇萬殊人
物禽獸竒形異模勢若飛動瞪眄睚眦明君暗主忠
臣烈夫威政興滅表賢示愚於是王正孟月朝陽登
曦天子乃施蒼玉轡蒼螭臨乎青陽左个方御瑤瑟

而彈鳴絲展乎國容輝乎皇儀傍瞻神臺順觀雲之
軌俯對清廟崇配天之規欽若矜蠻惟清緝熙崇牙
樹羽熒煌葳蕤納六服之貢受萬邦之籍張龍旗與
虹旌攢金戟與玉戚延五更進百辟奉珪瓚獻琛帛
顛昂俯僂儼容疊跡乃絜道醞修粢盛奠三犧薦五
牲享于神靈太祝正辭庶官精誠鼓大武之隱鱗張
鈞天之鏗訇孤竹合奏空桑和鳴盡六變齊九成羣
神來兮降明庭蓋聖主之所以孝治天下而享祀宵
冥也然後臨辟雍宴群后陰陽爲庖造化爲宰飡元
氣灑太和千里鼓舞百寮賡歌于斯之時雲油雨霈
恩鴻溶兮澤汪濊四海歸兮八荒會喙聒乎區寓駢

闕乎闕外羣臣醉德揖讓而退而聖主猶夕惕若厲
懼人未安乃目極于天耳下于泉飛聰馳明無遠不
察考鬼神之奧摧陰陽之荒下明詔班舊章振窮乏
散敖倉毀玉沉珠卑宮頽牆使山澤無間往來相望
帝躬乎天田后親於郊桑棄耒反本人和時康建翠
華兮萋萋鳴玉鑿之缺缺遊乎昇平之圃憩乎穆清
之堂天欣欣兮瑞穰穰巡陵於鶉首之野講武於驪
山之旁封岱宗兮祀后土掩栗陸而苞陶唐遂邀崆
峒之禮汾水之陽吸沆瀣之精黜滋味而貴理國其
若夢華胥之故鄉於是元元澹然不知所在若群雲
從龍衆水奔海此真所謂我大君登明堂之政化也

豈比夫秦趙吳楚爭高競奢結阿房與叢臺建姑蘇
及章華非享祀與嚴配徒掩月而凌霞由此觀之不
足稱也况瑤臺之巨麗復安可以語哉敢揚國美遂
作辭曰

穹崇明堂倚天開兮龍從鴻濛構瓌材兮偃蹇塊莽
邈崔嵬兮周流辟雍岌靈臺兮赫弈日噴風雷宗祀
膺蠶王化弘恢鎮八荒通九垓四門啓兮萬國來考
休徭兮進賢才儼若皇居而作固窮千祀兮悠哉

大獵賦并序

白以爲賦者古詩之流辭欲壯麗義歸博遠不然何
以光贊盛美感天動神而相如子雲競誇辭賦歷代

以爲文雄莫敢詆訐臣謂語其略竊或褊其用心子
虛所言楚國不過千里夢澤居其大半而齊徒吞若
八九三農及禽獸無息肩之地非諸侯禁淫述職之
義也上林云左蒼梧右西極者其實地周袤纔經數
百長揚誇胡設網爲周陸放麋鹿其中以搏攫充樂
羽獵於靈臺之囿圍經百里而開殿門當時以爲窮
壯極麗迨今觀之何齷齪之甚也但王者以四海爲
家萬姓爲子則天下之山林禽獸豈與衆庶異之而
臣以爲不能以大道匡君示物周博平文論苑之小
竊爲微臣之不取也今聖朝園池遐荒殫窮六合以
孟冬十月大獵於秦亦將曜威講武掃天蕩野豈淫

荒侈靡非三驅之意耶臣白作頌折中厥美其辭曰
粵若皇唐之契天地而襲氣母兮粲五葉之葳蕤惟
開元廓海寓而運斗極兮揔六聖之光熙誕金德之
淳精兮漱玉露之華滋文章森乎七曜兮制作參乎
兩儀括衆妙而爲師明無幽而不燭兮澤無遠而不
施慕往昔之三驅兮順生殺於四時若乃嚴冬慘切
寒氣凜冽不周來風玄冥掌雪木脫葉草解節土囊
煙陰火井冰閉是月也天子處乎玄堂之中食八水
兮休百工考王制兮遵國風樂農人之閑隙兮因校
獵而講戎乃使神兵出於九闕天仗羅於四野徵水
衡與林虞辨土物之衆寡千騎飈掃萬乘雷奔梢扶

桑而拂火雲兮括月窟而搜塞門赫壯觀於今古業
搖蕩於乾坤此其大略也而內以中華為天心外以
窮髮為海口豁咽喉以洞開吞荒裔以盡取大章按
步以來往夸父振策而奔走足跡乎日月之所通囊
括乎陰陽之未有君王於是撞鴻鐘發鑾音出鳳闕
開宸襟駕玉輅之飛龍歷神州之層岑遊五柞兮瞰
三危挾細柳兮過上林攢高牙以總總兮駐華蓋之
森森於是擢倚天之劍彎落月之弓崑崙叱兮可倒
宇宙噫兮增雄河漢為之却流川嶽為之生風羽旄
揚兮九天絳獵火燃兮千山紅乃召蚩尤之徒聚長
戟羅廣澤呵雨師走風伯稜威曜乎雷霆烜赫震於

蠻貊陋梁都之體制鄙靈囿之規格而南以衡霍作
襟北以岱常作袂夾東海而為壑兮拖西溟而流渠
麾九州之珍禽兮迴千羣以空入聯八荒之奇獸兮
屯萬族而來居雲羅高張天網密布罟罾原峭格掩
路蟻螻過而猶礙螭蜺飛而不度彼層霄與殊榛罕
翔鳥與伏兔從營合技彌巒被崗金戈森行洗晴野
之寒霜虹旗電掣卷長空之飛雪吳驂走練宛馬蹀
血縈衆山之聯縣隔遠水之明滅使五丁摧峯一夫
拔木下整高頽深平險谷擺椿栝開林叢嗶嗶呶呶
盡奔突於場中而田強古冶之疇烏獲中黃之黨越
崢嶸獵莽倉啞呼哮鬪風旋電往脫文豹之皮抵玄

熊之掌批後手猱挾三挈兩旣徒搏以角力又揮鋒
而爭先行魁號以鷄睨兮氣赫火而敵烟拳封猱引
巨犄梟羊應叱以斃踣獬貜亡精而墜巔或碎腦以
折脊或歎髓以飛涎窮遐荒蕩林藪扼土狎殪天狗
脫角犀項探牙象口掃封狐於千里捩雄虺之九首
咋騰蛇而仰吞拖奔兕以却走君王於是我通天靡
星旃奔雷車揮電鞭觀壯士之効獲顧三軍而欣然
曰夫何神狹鬼慄之駭人也又命建夔鼓勵武卒雖
躡躒之已多猶拗怒而未歇集赤羽兮照日張烏號
兮滿月戎車轆轤以陸離殼騎煌煌而奮發鷹犬之
所騰捷飛走之所蹉蹶攫麀麇之咆哮蹂豺貉以挂

格膏鋒染鏑填巖掩窟觀殊材舉逸群尚揮霍以出
沒別有白貂飛駿窮竒驅獠牙若錯劍鬣如叢竿口
吞爰鋌目極槍槽碎琅弧攫玉弩射猛彘透奔虎金
鏃一發旁疊四五雖鑿齒磨牙而致伉誰謂南山白
額之足覩揔八校搜四隅馳專諸走都盧趨喬林撒
絕壁抄獬獠攬貊獮囚鼬鼯於峻崖頓毅獲於穹石
養由發箭竒肱飛車巧聒更羸妙兼蒲且墜鷗瑪於
青雲落鴻鴈於紫虛捎鷓鴣漂鷓鴣彈地盧與神居
斬飛鵬於日域摧大鳳於天墟龍伯釣其靈鼈任公
獲其巨魚窮造化之譎詭何神怪之有餘所以噴血
流川飛毛灑雪狀若乎高天雨獸上墜於大荒又似

乎積禽爲山下崩於林穴陽烏沮色於朝日陰兔喪
精於明月思騰裝上獵於太清所恨穹昊於路絕而
忽也莫不海晏天空萬方來同雖秦皇與漢武兮復
何足以爭雄俄而君王茫然改容愀然有失於安思
危防險戒逸斯馳騁以狂發非至理之弘術且夫人
君以端拱爲尊玄妙爲寶暴殄天物是謂不道乃命
去三面之網示六合之仁已殺者皆其犯命未傷者
全其天真雖剪毛而不獻豈割鮮以悴輪解鳳皇與
鸞鷲兮旋駒虞與麒麟獲天寶於陳倉載非熊於渭
濱於是享獵徒封勞苦軒行庖騎酌醕韜兵戈火網
罟然後登九霄之臺宴八紘之圃開日月之局闢生

靈之戶聖人作而萬物覩覽蒐敖與狩岐何宣城之
足數哂穆王之荒誕歌白雲之西母曷若飽人以淡
泊之味醉時以淳和之觴鼓之以雷霆舞之以陰陽
虞乎神明狃於道德張無外以爲罝琢大朴以爲棧
頓天網以掩之獵賢俊以御極若此之狩罔有不克
使天人宴安草木蕃植六官斥其珠玉百姓樂於耕
織寢鄭衛之聲却靡曼之色天老掌圖風后侍側是
三階砥平而皇猷允塞豈比夫子虛上林長楊羽獵
計麋鹿之多少誇苑囿之大小哉方將延榮光於後
昆軼玄風於邃古擁嘉瑞臻元符登封於太山篆德
於社首豈與乎七十二帝同條而共貫哉君王於是

迴蜺旌反鑿輿訪廣成於至道問大塊之幽居使罔
象掇玄珠於赤水天下不知其所如也

大鵬賦并序

余昔於江陵見天台司馬子微謂余有仙風道骨可
與神遊八極之表因著大鵬遇希有鳥賦以自廣此
賦已傳于世往往人間見之悔其少作未窮宏達之
旨中年棄之及讀晉書觀阮宣子大鵬讚鄙心陋之
遂更記憶多將舊本不同今腹存手集豈敢傳諸作
者庶可示之子弟而已其辭曰

南華老仙一作仙老發天機於漆園吐崢嶸之高論開浩蕩
之奇言徵至一作志怪于齊諧談北溟之有魚吾不知幾

千里其名曰鯤化成大鵬質凝胚渾脫鬐鬣於海島
張羽毛於天門刷渤澥之春流晞扶桑之朝暾烜赫
于宇宙憑凌乎崑崙一鼓一舞煙濛沙昏五嶽爲之
震落百川爲之崩奔乃蹶厚地揭太清巨層霄突重
溟激三千以崛起向九萬而迂征背業大山一作虛之崔
嵬翼舉長雲之縱橫左迴右旋倏陰忽明歷汗漫以
夭矯扛閭闔之崢嶸簸鴻濛扇雷霆斗轉而天動山
搖而海傾怒無所搏雄無所爭固可想像其勢鬣騁
其形若乃足縈虹蜺目耀日月連軒沓拖揮霍翕忽
噴氣則六合生雲灑毛則千里飛雪邈彼北荒將窮
南圖運逸翰以傍擊鼓奔飈而長驅燭龍銜光以照

物列缺施鞭而啓途塊視三山杯觀一作看五湖其動也
神應其行也道俱任公見之而罷釣有窮不敢以鸞
弧莫不投竿失鏃仰之長吁爾其雄姿壯觀塊軋河
漢上摩蒼蒼下覆漫漫盤古開天而直視羲和倚日
而傍歎繽紛乎八荒之間掩映乎四海之半當留臆
之掩畫若混茫之未判忽騰覆以迴轉則霞廓而霧
散然後六月一息至于海湄歛翳景以橫者逆高天
而下垂憩乎決漭之野入乎汪洋之池猛勢所射餘
風所吹溟漲沸渭巖巒紛披天吳爲之袂慄海若爲
之躩踈巨鼇冠山而却走長鯨騰海而下馳縮殼挫
鬣莫之敢窺吾亦不測其神怪之若此蓋乃造化之

所爲豈比夫蓬萊之黃鵠誇金衣與菊裳恥蒼梧之
玄鳳耀綵質與錦章旣服御于靈仙久馴擾於池隍
精衛勤苦於銜木鷄鷓悲愁乎薦觴天鷄警曙于蟠
桃跋烏晰耀於太陽不曠蕩而縱適何拘孿而守常
未若茲鵬之逍遙無厥類乎此方不矜大而暴猛每
順時而行藏叅方根以比壽飲元氣以充腸戲暘谷
而徘徊滌炎洲而抑揚俄而希有鳥見謂之曰偉哉
鵬乎此之樂也吾右翼掩乎西極左翼蔽乎東荒跨
躡地絡周旋天綱以恍惚爲巢以虛無爲場我呼爾
遊爾同我翔于是乎大鵬許之欣然相隨此二禽已
登於寥廓而尺鷃之輩空見笑於藩籬

五三
五
劍閣賦

送友人王炎入蜀

咸陽之南直望五千里見雲峯之崔嵬前有劍閣橫
斷倚青天而中開上則松風蕭颯瑟颼有巴猿兮相
哀旁則飛湍走壑灑石噴閣洶湧而驚雷送佳人兮
此去復何時兮歸來望夫君兮安極我沉吟兮歎息
視滄波之東注悲白日之西匿鴻別燕兮秋聲雲愁
秦而暝色若明月出於劍閣兮與君兩鄉對酒而相
憶

擬恨賦

晨登太山一望蒿里松楸骨寒草宿墳毀浮生可嗟
大運同此於是僕本壯夫慷慨不歇仰思前賢飲恨

而歿昔如漢祖龍躍群雄競奔提劍叱咤指麾中原
東馳渤海西漂崑崙斷蛇奮怒掃清國步握瑤圖而
倏昇登紫壇而雄顧一朝長辭天下縞素若乃項王
虎鬪白日爭輝拔山力盡蓋卅心微聞楚歌之四合
知漢卒之重圍帳中劍舞泣挫雄威騅兮不逝喑鳴
何歸至如荆卿入秦直度易水長虹貫日寒風颯起
遠讎始皇擬報太子竒謀不成憤惋而死若夫陳后
失寵長門掩扉日冷金殿霜淒錦衣春草罷綠秋螢
亂飛恨桃李之委絕思君王之有違昔者屈原既放
遷於湘流心死舊楚魂飛長楸聽江楓之嫋嫋聞嶺
狖之啾啾永埋骨於淶水怨懷王之不收及夫李斯

受戮神氣黯然左右垂泣精魂動天執愛子以長別
歎黃犬之無緣或有從軍永決去國長違天涯遷客
海外思歸此人忽見愁雲蔽日目斷心飛莫不攢眉
痛骨杖血霑衣若乃錯繡轂填金門煙塵曉杳歌鐘
晝誼亦復星沉電滅閉影潛魂已矣哉桂華滿兮明
月輝扶桑曉兮白日飛玉顏減兮螻蟻聚碧臺空兮
歌舞稀與天道兮共盡莫不委骨而同歸

惜餘春賦

天之何爲令北斗而知春兮廻指於東方水蕩漾兮
碧色蘭蕙蕤兮紅芳試登高而望遠極雲海之微茫
魂一去兮欲斷淚流頰兮成行吟清楓而詠滄浪懷

洞庭兮悲瀟湘何余心之縹緲兮與春風而飄揚飄
揚兮思無垠念佳期兮莫展平原萋兮綺色愛芳草
兮如剪惜餘春之將闌每爲恨兮不淺漢之曲兮江
之潭把瑤草兮思何堪想遊女於峴北愁帝子於湘
南恨無極兮心盪盪目眇眇兮憂紛紛披衛情於淇
水結楚夢於陽雲春每歸兮花開花已闌兮春改歎
長河之流春送馳波於東海春不留兮時已失老衰
颯兮逾疾恨不得挂長繩於青天繫此西飛之白日
若有人兮情相親去南國兮往西秦見遊絲之橫路
網春輝以留人沉吟兮哀歌躑躅兮傷別送行子之
將遠看征鴻之稍滅醉愁心於垂楊隨柔條以糾結

望夫君兮咨嗟橫涕淚兮怨春華遙寄影於明月送夫君於天涯

愁陽春賦

東風歸來見碧草而知春蕩漾惚恍何垂楊旖旎之
愁人天光青而妍和海氣綠而芳新野綵翠兮芊
雲飄颻而相鮮演漾兮夤緣窺青一作新苔之生泉縹緲
兮翩緜見遊絲之縈煙魂與此兮俱斷醉一作對風光兮
悽然若乃隴水秦聲江猿巴吟明妃玉塞楚客楓林
試登高而望遠痛切骨一作咸而傷心春心蕩兮始波
春愁亂兮如雪兼萬情之悲歡茲一感於芳節若有
一人一作我所思兮湘水濱隔雲霓而見無因灑別淚於尺

波寄東流於情親若使春光可攬而花成兮吾欲贈天涯之佳人

悲清秋賦

登九疑兮望清川見三湘之潺湲水流寒以歸海雲
橫秋而蔽天余以鳥道計於故鄉兮不知去荆吳之
幾千于時西陽半規映島欲沒澄湖練明遙海上月念
佳期之浩蕩渺懷燕而望越荷花落兮江色秋風嫋
嫋兮夜悠悠臨窮溟以有羨思釣鼈於滄洲無脩竿
以一舉撫洪波而增憂歸去來兮人間不可以託此
吾將採藥於蓬丘

李太白文集卷第二十五

吳門繆昆武子甫重刊宋本

李太白文集卷第二十六

表

學士贈右拾遺李白

為吳王謝責赴行在遲滯表

為宋中丞請都金陵表

為宋中丞自薦表

書

代壽山荅孟少府移文書

上安州李長史書

與賈少公書

為趙宣城與楊右相書

與韓荊州朝宗書

上安州裴長史書

為吳王謝責赴行在遲滯表

臣某言伏蒙聖恩追赴行在臣誠惶誠恐頓首臣聞胡馬矯首嘶北風以踟顧越禽歸飛戀南枝而刷羽所以流波思其舊浦落葉墜於本根在物尚然矧於臣子臣位叨盤石辜負明時才闕摠戎謬當強寇驚拙有素天實知之伏惟陛下重紐乾綱再清國步慙臣不逮賜臣生全歸見白日死無遺恨然臣年過耳順風瘵日加鋒鏑殘骸劣有餘喘雖決力上道而心與願違貴貪尺寸之程轉增犬馬之戀非有他故以疾淹留今大舉天兵埽除戎羯所在郵驛徵發交馳

臣逐便水行難於陸進瞻望丹闕心魂若飛慙墜履之還收喜遺簪之再御不勝涕戀屏營之至

為宋中丞請都金陵表

臣某言臣誠惶誠恐頓首頓首臣聞社稷無常奉明者守之君臣無定位闇者失之所以父作子述重光疊輝天未絕晉人惟戴唐以功德有厚薄運數有脩短功高而福祚長永德薄而政教陵遲三后之姓於今為庶非一朝也伏惟陛下欽六聖之光訓擁千載之鴻休有國之本群生屬望粵自明兩光岐之陽昔有周太王之興發跡於此天啓有類豈人事歟皇朝百五十年金革不作逆胡竊號剝亂中原雖平嵩丘

填伊洛不足以掩宮城之骸骨決洪河灑秦雍不足以蕩犬羊之羶臊毒浸區宇憤盈穹旻此乃猛士奮劔之秋謀臣運籌之日夫不拯橫流何以彰聖德不斬巨猾無以興神功十亂佐周而克昌四兇及虞而乃去去元兇者非陛下而誰且道有興廢代有中季漢當三十七莽亦爲災赤伏再起丕業終光非陛下至神至聖安能勃然中興乎以臣料人事得失敢獻疑於陛下臣猶望愚夫千慮或異一得何者賊臣楊國忠蔽塞天聰屠割黎庶女弟席寵傾國弄權九土泉貨盡歸其室怨氣上激水旱荐臻重罹暴亂百姓力屈即欲平殄螫賊恐難應期且圖萬全之計以成

一舉之策今自河以北爲胡所凌自河之南孤城四壘大盜蠶食割爲洪溝宇宙嶢杌昭然可覩臣伏見金陵舊都地稱天險龍盤虎踞開扃自然六代皇居五福斯在雄圖霸跡隱軫由存咽喉控帶縈錯如繡天下衣冠士庶避地東吳永嘉南遷未盛於此臣又聞湯及盤庚五遷其邑典謨訓誥不以爲非衛文徙居楚丘風人流詠伏惟陛下因萬人之蕩析乘六合之譱張去扶風萬有一危之近邦就金陵太山必安之成策苟利於物斷在宸衷況齒革羽毛之所生榘柝豫章之所出元龜大貝充牣其中銀坑鐵冶連縣相屬剡銅陵爲金穴煮海水爲鹽山以征則兵強以

守則國富橫制八極克復兩京俗畜來蘇之歡人多
後后之望陛下西以峨眉爲壁壘東以滄海爲溝池
守海陵之倉獵長洲之苑雖上林五柞復何加焉上
皇居天帝運昌之都儲精真一之境有虞則北閉劍
閣南扃瞿塘蚩尤共工五兵莫向二聖高枕人何憂
哉飛章問安往復巴峽朝發白帝暮宿江陵首尾相
應率然之舉不勝屏營瞻雲望日之至

爲宋中丞自薦表

臣某聞天地閉而賢人隱雲雷屯而君子用臣伏見
前翰林供奉李白年五十有七天寶初五府交辟不
求聞達亦由子真谷口名動京師上皇聞而悅之召

入禁掖旣潤色於鴻業或間草於王言雍容揄揚特
見褒賞爲賤臣詐詭遂放歸山閑居製作言盈數萬
屬逆胡暴亂避地廬山遇永王東巡脅行中道奔走
却至彭澤具已陳首前後經宣慰大使崔 及臣推
覆清雪尋經奏聞臣聞古之諸侯進賢受上賞蔽賢
受明戮若三適稱美必九錫先榮垂之典謀永以爲
訓臣所薦李白實審無辜懷經濟之才抗巢由之節
文可以變風俗學可以究天人一命不霑四海稱屈
伏惟陛下大明廣運至道無偏收其希世之英以爲
清朝之寶昔四皓遭高皇而不起翼惠帝而方來君
臣離合亦各有數豈使此人名揚宇宙而枯槁當年

傳曰舉逸人而天下歸心伏惟陛下迴太陽之高暉
流覆盆之下照特請拜一京官獻可替否以光朝列
則四海豪俊引領知歸不勝悽悽之至敢陳薦以聞

代壽山荅孟少府移文書

淮南小壽山謹使東峯金衣雙鶴銜飛雲錦書于維
揚孟公足下曰僕包大塊之氣生洪荒之間連翼軫
之分野控荆衡之遠勢盤薄萬古邈然星河憑天霓
以結峯倚斗極而橫嶂頗能攢吸霞雨隱居靈仙產
隋侯之明珠蓄卞氏之光寶罄宇宙之美殫造化之
竒方與崑崙抗行閩風接境何人間巫廬台霍之足
陳耶一昨於山人李白處奉見吾子移文責僕以多

竒叱僕以特秀而盛談三山五嶽之美謂僕小山無
名無德而稱焉觀乎斯言何太謬之甚也吾子豈不
聞乎無名爲天地之始有名爲萬物之母假令登封
禋祀曷足以大道譏耶然能損人費物庖殺致祭暴
殄草木鐫刻金石使載圖典亦未足爲貴乎且達人
莊生常有餘論以爲尺鷃不羨於鵬鳥秋毫可並於
太山由斯而談何小大之殊也又怪於諸山藏國寶
隱國賢使吾君勝道燒山披訪不獲非通談也夫皇
王登極瑞物昭至蒲萄翡翠以納貢河圖洛書以應
符設天網而掩賢窮月竊以率職天不祕寶地不藏
珍風威百蠻春養萬物王道無外何英賢珍玉而能

伏匿於巖穴耶所謂榜道燒山此則王者之德未廣矣昔太公大賢傅說明德棲渭川之水藏虞虢之巖卒能形諸兆朕感乎夢想此則天道闇合豈勞乎搜訪哉果投竿詣麾捨築作相佐周文讚武丁摠而論之山亦何罪乃知巖穴為養賢之域林泉非祕寶之區則僕之諸山亦何負於國家矣近者逸人李白自峨眉而來爾其天為容道為貌不屈已不干人巢由以來一人而已乃蚪蟠龜息遁乎此山僕嘗弄之以綠綺卧之以碧雲嗽之以瓊液餌之以金砂既而童顏益春真氣愈茂將欲倚劔天外挂弓扶桑浮四海橫八荒出宇宙之寥廓登雲天之眇茫俄而李公仰

天長吁謂其友人曰吾未可去也吾與爾達則兼濟天下窮則獨善一身安能食君紫霞蔭君青松乘君鸞鶴駕君蚪龍一朝飛騰為方丈蓬萊之人耳此則未可也乃相與卷其丹書匣其瑤瑟申管晏之談謀帝王之術奮其智能願為輔弼使寰區大定海縣清一事君之道成榮親之義畢然後與陶朱留侯浮五湖戲滄洲不足為難矣即僕林下之所隱客豈不大哉必能資其聰明輔以正氣借之以物色發之以文章雖煙花中貧沒齒無恨其有山精木魅雄虺猛獸以驅之四荒磔裂原野使影跡絕滅不干戶庭亦遣清風掃門明月侍坐此乃養賢之心實亦勤矣孟子

孟子無見深責耶明年青春求我於此巖也

上安州李長史書

白嶽崎歷落可笑人也雖然頗嘗覽千載觀百家至於聖賢相似厥衆則有若似於仲尼紀信似於高祖牢之似於無忌宋玉似於屈原而遙觀君侯竊疑魏洽便欲趨就臨然舉鞭遲疑之間未及迴避且理有疑誤而成過事有形似而類真惟大雅含弘方能恕之也白少頗周慎忝聞義方入暗室而無欺屬昏行而不變今小人履疑誤形似之迹君侯流愷悌矜捨之恩戢秋霜之威布冬日之愛晬容有穆怒顏不彰雖將軍息恨於長孫一作孺之前此無慙德司空受揖於

元淑之際彼未爲賢一言見寃九死非謝白孤劍誰託悲歌自憐迫於恓惶席不暇暖寄絕國而何仰若浮雲而無依南徙莫從北遊失路言客汝海近還邛城昨遇故人飲以狂藥一酌一笑陶然樂酣困河朔之清觴飲中山之醇酎屬早日初眩晨霾未收乏離朱之明昧王戎之視青白其眼曹而前行亦何異抗莊公之輪怒螳螂之臂御者趨召明其是非入門鞠躬精魄飛散昔徐邈緣醉而賞魏王却以爲賢無鹽因醜而獲齊君待之逾厚白妄人也安能比之上挂國風相鼠之譏下懷周易履虎之懼慙以固陋禮而遣之幸容甯越之辜深荷王公之德銘刻心骨退思

狂憊五情冰炭罔知所措晝愧於影夜慙於魄啓處
不惶戰跼無地伏惟君侯明奪秋月均韶風掃塵
辭場振發文雅陸機作太康之傑士未可比肩曹植
爲建武之雄才惟堪捧駕天下豪俊翕然趨風白之
不敏竊慕餘論何圖叔夜潦倒不切於事情正平猖
狂自貽於恥辱一忤容色終身厚顏敢沐芳負荆請
罪門下儻免以訓責恤其愚蒙如能伏劔結纓謝君
侯之德敢一夜力撰春遊救苦寺詩一首十韻石巖
寺詩一首八韻上楊都尉詩一首三十韻辭旨狂野
貴露下情輕干視聽幸乞詳覽

與賈少公書

宿昔惟清勝白絲疾疲茆去期恬退才微識淺無足
濟時雖中原橫潰將何以救之王命崇重大揔元戎
辟書三至人輕禮重嚴期迫切難以固辭扶力一行
前觀進退且殷源廬嶽十載時人觀其起與不起以
卜江左興亡謝安高卧東山蒼蒼生屬望白不樹矯抗
之跡恥振玄邈之風混遊漁商隱不絕俗豈徒販賣
雲壑要射虛名方之二子實有慙德徒塵忝幕府終
無能爲唯當報國薦賢持以自免斯言若謬天實殛
之以足下深知具申中款惠子知我夫何閒然勾當
小事但增悚惕

爲趙城與楊右相

某啓辭違積年伏戀軒屏首冬初寒伏惟相公尊體
起居萬福某蒙恩才朽齒邁徒延聖日少忝末吏本
乏遠圖中年廢缺分歸園壑昔相公秉國憲之日一拔
九霄拂刷前恥昇騰晚官恩貸稠疊實戴丘山落羽
再振枯鱗旋躍運以大風之舉假以磨天之翔衣繡
霜臺合香華省宰劇慙強項之名酌貪礪清心之節
三典列郡寂無成功但宣布王澤式酬天獎伏惟相
公開張徽猷寅亮天地入夔龍之室持造化之權安
石高枕蒼生是仰某鳴躍無已剪拂因人銀章朱紱
坐榮官達身荷宸睠目識龍顏既齊飛於鸞鷲復寄
跡於門館皆相公大造之力也而鐘鳴漏盡夜行不

息止足之分實媿古人犬馬戀主迫於西汜所冀枯
松晚歲無改節於風霜老驥餘年期盡力於蹄足上
荅明主下報相公悽悽之誠屏息於此伏惟相公收
遺簪於少昊念亡弓於楚澤衰當益壯結草知歸瞻
望恩光無忘景刻

與韓荊州書

白聞天下談士相聚而言曰生不用萬戶侯但願一
識韓荊州何令人之景慕一至於此耶豈不以有周
公之風躬吐握之事使海內豪俊奔走而歸之一登
龍門則聲譽十倍所以龍盤鳳逸之士皆欲收名定
價於君侯願君侯不以富貴而驕之寒賤而忽之則

三千賓中有毛遂使白得穎脫而出即其人焉白隴西布衣流落楚漢十五好劍術徧干諸侯三十成章歷抵卿相雖長不滿七尺而心雄萬夫王公大臣許與氣義此疇曩心跡安敢不盡於君侯爲君侯制作侔神明德行動天地筆參於造化學究於天人幸願開張心顏不以長揖見拒必若接之以高宴縱之以清談請日試萬言倚馬可待今天下以君侯爲文章之司命人物之權衡一經品題便作佳士而君侯何惜階前盈尺之地不使白揚眉吐氣激昂青雲耶昔王子師爲豫章未下車即辟荀慈明既下車又辟孔文舉山濤作冀州甄拔三十餘人或爲侍中尚書

先代所美而君侯亦薦一嚴協律入爲祕書郎中間崔宗之房習祖黎昕許瑩之徒或以才名見知或以清白見賞白每觀其銜恩撫躬忠義奮發白以此感激知君侯推赤心於諸賢腹中所以不歸他人而願委身國士儻急難有用敢効微驅且人非堯舜誰能盡善白謨猷籌畫安能盡矜至於制作積成卷軸則欲塵穢視聽恐雕蟲小伎不合大人若賜觀蒨莛請給以紙墨兼人書之然後退歸閑軒繕寫呈上庶青萍結綠長價於薛卞之門幸惟下流大開獎飾惟君侯圖之

上安州裴長史書

白聞天不言而四時行地不語而百物生白人焉非
天地也安得不言而知乎敢剖心析肝論舉身之事
便當談笑以明其心而粗陳其大綱一快憤懣惟君
侯察焉白本家金陵世爲右姓遭沮渠蒙遜難奔流
咸秦因官寓家少長江漢五歲誦六甲十歲觀百家
軒轅以來頗得聞矣常橫經籍書制作不倦迄于今
三十春矣以爲士生則桑弧蓬矢射乎四方故知大
丈夫必有四方之志乃杖劍去國辭親遠遊南窮蒼
梧東涉溟海見鄉人相如大誇雲夢之事去楚有七
澤遂來觀焉而許相公家見招妻以孫女便憩于此
至移三霜焉曩昔東遊維揚不逾一年散金三十餘

萬有落魄公子悉皆濟之此則是白之輕財好施也
又昔與蜀中友人吳指南同遊於楚指南死於洞庭
之上白禫服慟哭若喪天倫炎月伏屍泣盡而繼之
以血行路間者悉皆傷心猛虎前臨堅守不動遂權
殯於湖側便之金陵數年來觀筋骨尚在白雪泣持
刃躬申洗削裹骨徒步負之而趨寢興攜持無輟身
手遂丐貸營葬於鄂城之東故鄉路遙魂魄無主禮
以遷窆式昭明情此則是白存交重義也又昔與逸
人東巖子隱於岷山之陽白巢居數年不跡城市養
竒禽千計呼皆就掌取食了無驚猜廣漢太守聞而
異之詣廬親覩因舉二人以有道並不起此則白養

高志機不屈之跡也又前禮部尚書蘇公出爲益州長史白於路中投刺待以布衣之禮因謂羣寮曰此子天才英麗下筆不休雖風力未成且見專車之骨若廣之以學可以相如比肩也四海明識具知此談前此郡督馬公朝野豪彥一見禮許爲奇才因謂長史李京之曰諸人之文猶山無煙霞春無草樹李白之文清雄奔放名章俊語絡繹間起光明洞澈句句動人此則故交元丹親接斯議若蘇馬二公愚人也復何足盡陳儻賢賢也白有可尚夫唐虞之際於斯爲盛有婦人焉九人而已是知才難不可多得白野人也頗工於文惟君侯顧之無按劍也伏惟君侯貴

而且賢鷹揚虎視齒若編貝膚如凝脂昭昭乎若玉山上行朗然映人也而高義重諾名飛天京四方諸侯聞風暗許倚劍慷慨氣干虹蜺月費千金日宴群客出躍駿馬入羅紅顏所在之處賓朋成市故時節歌曰賓朋何喧喧日夜裴公門願得裴公之一言不須驅馬將華軒白不知君侯何以得此聲於天壤之間豈不由重諾好賢謙以得也而晚節改操棲情翰林天才超然度越作者屈佐却國時惟清哉稜威雄雄下熠羣物白竊慕高義已經十年雲山間之造謁無路今也運會得趨末塵承顏接辭八九度矣常欲一雪心跡崎嶇未便何圖謗言忽生衆口攢毀將欲

投杼下客震於嚴威然自明無辜何憂悔吝孔子曰
畏天命畏大人畏聖人之言過此三者鬼神不害若
使事得其實罪當其身則將浴蘭沐芳自屏於烹鮮
之地惟君侯死生不然投山竄海轉死溝壑豈能明
目張膽託書自陳耶昔王東海問犯夜者曰何所從
來荅曰從師受學不覺日晚王曰吾豈可鞭撻甯越
以立威名想君侯通人必不爾也願君侯惠以大遇
洞開心顏終乎前恩再辱英眇白必能使精誠動天
長虹貫日直度易水不以爲寒若赫然作威加以大
怒不許門下逐之長途白即膝行於前再拜而去西
入秦海一觀國風永辭君侯黃鵠舉矣何王公大人

之門不可以彈長劍乎

李太白文集卷第二十六

吳郡繆曷武子甫重刊宋本

李太白文集卷第二十七

序

暮春於江夏送張祖監丞之東都序

奉餞十七翁二十四翁尋桃花源序

夏日奉陪司馬武公與羣賢宴姑熟亭序

江夏送林公上人遊衡嶽序

金陵與諸賢送權十一序

春於姑熟亭送趙少府遷炎方序

秋於敬亭送從姪端游廬山序

送黃鐘之鄱陽謁張使君序

早春於江夏送蔡十還家雲夢序

秋日太原南柵餞陽曲王贊賈少公石艾尹

公應舉赴上都序

江夏送倩公歸東序

餞李副使藏用移軍廣陵序

澤畔吟序

夏日諸從弟登汝州龍興閣序

秋日於安府送孟贊府兄還都序

春夜宴從弟桃花園序

冬夜於隨州紫陽先生食霞樓送烟子元

演隱仙城山序

送戴十五歸衡嶽序

早夏於將軍叔宅與諸昆季送傅八之江南序

冬日於龍門送從弟京兆叅軍令問之淮南

覲省年序

暮春江夏送張祖監丞之東都序

吁咄哉僕書室坐愁亦已久矣每思欲遐登蓬萊極
目四海手弄白日頂摩青穹揮斤幽憤不可得也而
金骨未變玉顏已緇何常不捫松傷心撫鶴歎息誤
學書劍薄遊人間紫微九重碧山萬里有才無命甘
於後時劉表不用於襜衡暫來江夏賀循喜逢於張
翰且樂船中達人張侯大雅君子統泛舟之役在清
川之湄談玄賦詩連興數月醉盡花柳賞窮江山國

祖有程告以行邁煙景晚色慘爲愁容繫飛帆於半
天泛淥水於遙海欲去不忍更開芳樽樂雖寰中趣
逸天半平生酣暢未若此筵至於清談浩歌雄筆麗
藻笑飲醪酒醉揮素琴余實不愧於古人也揚袂遠
別何時歸來想洛陽之秋風將膾魚以相待詩可贈
遠無乃闕乎

奉餞十七翁二十四翁尋桃花源序

昔祖龍滅古道嚴威刑煎熬生人若墜大火三墳五
典散爲寒灰築長城建阿房并諸侯殺豪俊自謂功
高羲皇國可萬世思欲凌雲氣求仙人登封太山風
雨暴作雖五松受職草木有知而萬象乖度禮刑將

弛則綺皓不得不遁於南山魯連不得不蹈於東海
則桃源之避世者可謂超升先覺夫指鹿之儔連頸
而同死非吾黨之謂乎二翁耽老氏之言繼少卿之
作文以述大雅道以通至精卷舒天地之心脫落神
仙之境武陵遺跡可得而窺焉問津利往水引漁者
苑藏仙谿春風不知從來落英何許流出石洞來入
晨光盡開有良田名池竹果森列三十六洞別爲一
天耶今扁舟而行然笑謝人世阡陌未改古人依然
白雲何時而歸來青山一去而誰往諸公賦桃源以
美之

夏日奉陪司馬武公與羣賢宴姑熟亭序

通驛公館南有水亭焉四薨翬飛巉絕浦嶼蓋有前
攝令河東薛公棟而宇之令宰隴西李公明化開物
成務又橫其梁而閣之晝鳴閑琴夕酌清月蓋為接
輜軒祖遠客之佳境也製置既久莫知何名司馬武
公長材博古獨映方外因據胡牀岸嘖嘖詠而謂前
長史李公及諸公曰此亭跨姑熟之水可稱為姑熟
亭焉嘉名勝槩自我作也且夫曹官紱冕者大賢處
之若遊青山卧白雲逍遙偃傲何適不可小才居之
窘而自拘悄若桎梏則清風朗月河英嶽秀皆為棄
物安得稱焉所以司馬南鄰當文章之旗鼓翰林客
卿揮辭鋒以戰勝名教樂地無非得俊之場也千載

一時言詩紀志

江夏送林公上人遊衡嶽序

江南之仙山黃鶴之爽氣偶得英粹後生俊人林公
世為豪家此土之秀落髮歸道專精律儀白月在天
朗然獨出既灑落於彩翰亦諷詩於金口閑雲無心
與化偕往欲將振五樓之金策浮三湘之碧波乘杯
泝流考室名嶽瞰憩冥壑凌臨諸天登祝融之峯巒
望長沙之煙火遙謝舊國誓遺歸蹤百千開士稀有
此者余所以歎其峻節揚其清波龍像先輩迴眸拭
視此夫汨泥沙者相去如牛之一毛昔智者安禪於
台山遠公托志於廬嶽高標勝槩斯亦嚮慕哉紫霞

搖心青楓夾岸目斷川上送君此行羣公臨流賦詩以贈

金陵與諸賢送權十一序

斯高柄秦嬴世不二三傑伏草與漢並出莽夷朱暉耿鄧乃起自古英達未必盡用於當年去就之理在大運爾我君六葉繼聖熙乎玄風三清垂拱穆然紫極天人其一哉所以青雲豪士散在商釣四坐明哲皆清朝旅人吾希風廣成蕩漾浮世素受寶訣爲三十六帝之外臣即四明逸老賀知章呼余爲謫仙人蓋實錄耳而嘗採姹女於江華收河車於清溪與天水權昭夷服勤爐火之業久矣之子也冲恬淵靜翰

才峻發白每一篇一札皆昭夷之所操吁捨我而南若折羽翼時歲律寒苦天風枯聲雲帆涉漢罔若絕雷舉目四顧霜天崢嶸銜杯敘離羣子賦詩以出餞酒仙翁李白辭

春於姑熟送趙四流炎方序

白以鄒魯多鴻儒燕趙饒壯士蓋風土之然乎趙少翁才貌瓌雅志氣豪烈以黃綬作尉泥蟠當塗亦雞棲鶴籠不足以窘束鸞鳳耳以疾惡抵法遷于炎方辭高堂而墜心指絕國以搖恨天與水遠雲連山長借光景於頃刻開壺觴於洲渚黃鶴曉別愁聞命子之聲青楓暝色盡是傷心之樹然自吳瞻秦日見喜

氣上當攫玉弩摧狼狐洗清天地雷雨必作冀白日
迴照丹心可明巴陵半道坐見還吳之棹令雪解而
松柏振色氣和而蘭蕙開芳僕西登天門望子於西
江之上吾賢可流水其道浮雲其身通方大適何往
不可何戚戚於路歧哉

秋於勸亭送從姪崇遊廬山序

余小時大人令誦子虛賦私心慕之及長南遊雲夢
覽七澤之壯觀酒隱安陸蹉跎十年初嘉興季父謫
長沙西還時途拜見預飲林下崇乃稚子嬉遊在傍
今來有成鬱負秀氣吾衰久矣見爾慰心中悲導舊
破涕爲笑方告我遠涉西登香爐長山橫蹙九江却

轉瀑布天落半與銀河爭流騰虹奔電潑射萬壑此
宇宙之竒詭也其上有方湖石井不可得而窺焉羨
君此行撫鶴長嘯恨丹液未就白龍來遲使秦人著
鞭先往桃花之水孤負夙願慙歸名山終期後來攜
手五嶽情以送遠詩寧闕乎

送黃鐘之鄱陽謁張使君序

東南之美者有江夏黃公焉白切飲風流嘗接談笑
亦有抗節玉立光輝固然氣高時英辯折天口道可
濟物志棲無垠鄱陽張公朝野榮望愛客接士即原
嘗春陵之亞焉每欽其辭華懸榻見往而黃公因訪
古跡便從貴遊乃僑裝撰行去國遐陟諸子銜酒惜

別脫巾贈分沈醉烟夕惆悵涼月天南迴以變夏火
西飛而獻秋汀葭颯然海草微落夫子行邁我心若
何母金玉爾音而有遐心湖水悠沔曷哉是待共賦
武昌釣臺篇以慰別情耳

早春於江夏送蔡十還家雲夢序

吾觀蔡侯奇人也爾其才高氣遠有四方之志不然
何周流宇宙太多耶白遐窮冥搜亦以早矣海草三
綠不歸國門又更逢春再結鄉思一見夫子冥心道
存窮朝晚以作宴驅煙霞以輔賞即笑明月時眠落
花斯遊無何尋告睽索來暫觀我去還愁人乃浮漢
陽入雲夢鄉柰云叩歸魂亦飛且青山綠楓累道相

接遇勝因賞利君前行既非遠離曷足多歎秋七月
結遊鏡湖無憊我期先子而往敬慎好去終當早來
無使耶川白雲不得復弄爾鄉中廖公及諸才子爲
詩略謝之

秋日於太原南柵餞陽曲王贊

公賈少公石文尹少
公應舉赴上都序

天王三京北都居一其風俗遠蓋陶唐氏之人歟襟
四塞之要衝控五原之都邑雄藩劇鎮非賢莫居則
陽曲丞王公神仙之胄也爾其學鏡千古知周萬殊
又若少府賈公以述作之雄也鼇弄筆海虎攫辭場
又若石艾尹少公廊廟之器口折黃馬手揮青萍咸
道貫於人倫名飛於日下實難沉屈永懷青霄劍有

隱而氣衝七星珠雖潛而光照萬壑今年春皇帝有事千畝湛恩八埏大搜羣才以緝邦政而王公以令宰見舉賈公以王霸昇聞海激佇乎三千天飛期於六月必有以也豈徒然哉有從兄太原主簿舒才華動時規謀匠物乃黜翠幕筵虹梁瓊著霞開羽觴雷舉然後抗目遠覽憑軒高吟汾河鏡開漲藍都之氣色晉山屏列橫朔塞之郊原屏俗事於煩襟結浮歡於落景俄而皓月生海來窺醉容黃雲出關半起秋色數君乃輟酌慷慨搖心促裝望丹闕而非遠揮玉鞭而且去白也不敏先鳴翰林幸叨玳瑁之筵敢竭麒麟之筆請各探韻賦詩寵行

江夏送倩公歸漢東序

昔謝安四十卧白雲於東山桓公素徵爲蒼生而一起常與支公遊賞貴而不移大人君子神冥契合正可乃爾僕與倩公一面不忝古人言歸漢東使我心悔夫漢東之國聖人所出神農之後季良爲大賢爾來寂寂無一物可紀有唐中興始生紫陽先生先生六十而隱化若繼跡而起者惟倩公焉蓄壯志而未就期老成於他日且能傾產重諾好賢士文即惠休上人與江鮑往復各一時也僕平生述作罄其草而授之思親遂行流涕惜別今聖朝已捨季布當徵賈生開顏洗目一見白日翼相視而笑於新松之山耶

作小詩絕句以寫別意

彼美漢東國川藏明月輝寧知喪亂後更有一珠歸
餞李副使藏用移軍廣陵序

夫功未足以蓋世威不可以震主必挾此者持之安
歸所以彭越醢於前韓信誅於後況權位不及於此
者虛生危疑而潛苞禍心小拒王命是以謀臣將啖
以節鉞誘而烹之亦由借鴻濤於奔鯨鱸生人於哮
虎呼吸江海橫流百川左縈右拂十有餘郡國計未
及誰當其鋒我副使李公勇冠三軍衆無一旅橫倚
天之劍揮駐日之戈吟嘯四顧熊羆雨集蒙輪扛鼎
之士杖干將而星羅上可以決天雲下可以絕地維

翕振虎旅赫張王師退如山立進若電逝轉戰百勝
疆屍盈川水膏於滄溟陸血於原野一掃瓦解洗清
全吳可謂萬里長城橫斷楚塞不然五嶺之北盡餌
於脩蛇勢盤地蹙不可圖也而功大用小天高路遐
社稷雖定於劉章封侯未施於李廣使慷慨之士長
吁青雲且移軍廣陵恭揖後命組練照雪樓船乘風
簫鼓沸而三山動旌旗揚而九天轉良牧出祖烈將
登筵歌酣易水之風氣振武安之瓦海日夜色雲河
中流席闌賦詩以壯三軍之事白也筆已老矣序何
能為

澤畔吟序

澤畔吟者逐臣崔公之所作也公代業文宗早茂才
秀起家校書蓬山再尉開輔中佐于憲車因貶湘陰
從官二十有八載而官未登於郎署何遇時而不偶
耶所謂大名難居碩果不食流離乎沅湘摧頓於草
莽同時得罪者數十人或才長命夭覆巢蕩室崔公
忠憤義烈形于清辭慟哭澤畔哀形翰墨猶風雅之
什聞之者無罪覩之者作鏡書所感遇物二十章名
之曰澤畔吟懼奸臣之猜常韜之於竹簡酷吏將至
則藏之於名山前後數四蠹傷卷軸觀其逸氣頓挫
英風激揚橫波遺流騰薄萬古至於微而彰婉而麗
悲不自我興成他人豈不云怨者之流乎余覽之愴

然掩卷揮涕為之序云

夏日諸從弟登汝州龍興閣序

夫槿榮芳園蟬嘯珍木蓋紀乎南火之月也可以處
臺榭居高明吾之友于順此意也遂卜精勝得乎龍
興留寶馬於門外步金梯於閣上漸出軒戶遐瞻雲
天晴山翠遠而四合暮江碧流而一色屈指鄉路還
疑夢中開襟危欄宛若空外嗚呼屈宋長逝無堪與
言起予者誰得我二季當揮爾鳳藻搜乎需觴與白
雲老兄俱莫負古人也

秋夜於安府送孟贊府兄還都序

夫士有飾危冠佩長劔揚眉吐諾激昂青雲者咸誇

炫意氣託交王侯若告之急難乃十失八九我義兄
孟子則不然耶道合而襟期暗親志乖而肝膽楚越
鴻騫鳳立不循常流孔明披書每觀於大略少君讀
易時作於小文四方賢豪眩然景慕雖長不過七尺
而心雄萬夫至於酒情中酣天機俊發則談笑滿席
風雲動天非嵩丘騰精何以及此白以弱植早飲香
名況親承光輝恩甚華萼他鄉此別誰無恨耶時林
風吹霜散下秋草海鴈嘶月孤飛朔雲驚魂動骨戛
瑟落涕抗手緬邁傷如之何且各賦詩以寵歧路

春夜宴從弟桃花園序

夫天地者萬物之逆旅也光陰者百代之過客也而

浮生若夢爲歡幾何古人秉燭夜遊良有以也况陽
春召我以烟景大塊假我以文章會桃花之芳園序
天倫之樂事羣季俊秀皆爲惠連吾人詠歌獨慙康
樂幽賞未已高談轉清開瓊筵以坐花飛羽觴而醉
月不有佳詠何伸雅懷如詩不成罰依金谷酒斗數
冬夜於隨州紫陽先生食霞樓送烟子元演

隱仙城山序

吾與霞子元丹烟子元演氣激道合結神仙交殊身
同心誓老雲海不可奪也歷可天下周求名山入神
農之故鄉得胡公之精術胡公身揭日月心飛蓬萊
起食霞之孤樓鍊吸景之精氣延我數子高談混元

金書玉訣盡在此矣白乃語及形勝紫陽因大誇仙
城元侯聞之乘興將往別酒寒酌醉青田而少留夢
魂曉飛度淥水以先去吾不滯於物與時推移出則
以平交王侯遁則以俯視巢許朱紱狎我綠蘿未歸
恨不得同棲烟林對坐松月有所款然銘契潭石乘
春當來且抱琴卧花高枕相待詩以寵別賦而贈之

送戴十五歸衡嶽序

白上探玄古中觀人世下察交道海內豪俊相識如
浮雲自謂德叅夷顏才亞孔墨莫不名由口進實從
事退而風義可合者厥惟戴侯寓居長沙稟湖嶽之
氣少長咸洛窺霸王之圖精微可以入神懿重可以

崇德謨猷可以尊主文藻可以成化兼以五材統以
四美何往而不濟也其二三諸昆皆以才秀擢用辭
翰炳發昇聞天朝而此君獨潛光後世以期大用鯤
海未躍鵬霄悠然不遠千里訪余以道邛國之秀有
康侯焉人倫精鑒天下獨立每延以宴謔許為通人
獨孤有鄰及薛諸公咸亦以為信然矣屬明主未夢
且歸衡陽憩祝融之雲峯弄茱萸之湍水軒騎糾合
祖於魏公之林亭笙歌鳴秋劒舞增氣況江葉墜綠
沙鴻冥飛登高送遠使人心醉見周張二子為論平
生雞黍之期當速赴也

早夏於江將軍叔宅與諸昆季送傅八之江

南序

易曰觀乎人文以化成天下窮此道者其惟傅侯耶
侯篇章驚新海內稱善五言之作妙絕當時陶公愧
田園之能謝客慙山水之美佳句籍籍人爲羨談前
許州司馬宋公蘊冰清之姿重傅侯玉潤之德妻以
其子鳳皇于飛潘陽之好斯爲睦矣僕不佞也忝于
芳塵宴同一筵心契千古清酌連曉立談入微歡攜
無何旋告睽坼將軍叔英略蓋古英明洞神天王貴
宗誕育賢子八龍增秀以列次五色相輝而有文會
言高樂曉餞金門洗德絃觴怡顏朱明草木已盛且
江嶂若畫賞盈前途自然屏間坐遊鏡裏行到霞月

千里足供文章之用哉征帆空懸落日相逼二李揮
翰詩其贈焉

冬日於龍門送從弟京兆參軍令問之淮南觀
省序

紫雲仙季有英風焉吾家見之若衆星之有月貴則
天王之令弟寶則海嶽之奇精遊者所謂風生玉林
清明蕭灑真不虛也常醉目吾曰兄心肝五藏皆錦
繡耶不然何開口成文揮翰霧散吾因撫掌大笑揚
眉當之使王澄再聞亦復絕倒觀夫筆走羣象思通
神明龍章炳然可得而見歲十二月拜省于淮南思
白華之長吟眺黃雲之晚色目斷心盡情懸高堂傾

蘭醕而送行赫金鞍而照地錯轂蹲野朝英滿筵非
才名動時何以及此日落酒罷前山陰煙靄勤惠言
吾道東坐想洛橋春色先到淮城見千條之綠楊折
一枝以相贈則華萼情在吾無恨焉羣公賦詩以光
榮餞

李太白文集卷第二十七

吳韻繆晁武字甫重刊宋本

李太白文集卷第二十八

讚

學士贈右拾遺李白

當塗李宰君畫讚

金陵名僧頽公粉圖慈親讚

李居士讚

安吉崔少府翰畫讚

宣城吳錄事畫

壁畫蒼鷹詩

方城張少公廳畫師猛讚

羽林范將軍畫讚

金銀泥畫西方淨土變相讚

江寧楊利物畫讚

金鄉薛少府廳畫鶴讚

誌公畫讚

琴讚

朱虛侯讚

觀飲飛斬蛟圖讚

地藏菩薩讚

魯郡葉和尚讚

當塗李宰君畫讚

天垂元精嶽降粹靈應期命世大賢乃生吐奇獻策
敷聞王庭帝用休之揚光泰清濫觴百里涵量八溟
縉雲飛聲當塗政成雅頌一變江山再榮舉邑抃舞
式圖丹青眉秀華蓋目朗明星鶴矯閔風麟騰玉京
若揭日月昭然運行窮神闡化永世作程

金陵名僧頽公粉圖慈親讚

神妙不死惜生此身託體明淑而稱厥親粉為造化
筆寫天真貌古松雪心空世塵文伯之母可以為鄰

李居士讚

至人之心如鏡中影揮斤萬變動不離靜彼質我斤

揮風是騁了物無二皆為匠郢吾族賢老名喧寫真
貌圖粉繪生為垢塵從白得衰與天為鄰默然不滅
長存此身

安吉崔少府翰畫讚

齊表巨海吳嗟大風崔為令族出自太公克生奇才
骨秀神聰炳若秋月騫然雲鴻爰圖伊人奪妙真宰
卓立欲語謂行而在清晨一觀爽氣十倍張之座隅
仰止光彩

宣城吳錄事畫讚

大名之家昭彰日月生此髦士風霜秀骨圖真像賢
傳容寫髮束帶嶽立如朝天闕巖巖兮謂四方之削

成澹澹兮申五湖之澄明武庫肅穆辭峯崢嶸大辯
若訥大音希聲默然不語終為國禎

壁畫蒼鷹讚譏主人

突兀枯樹傍無寸枝上有蒼鷹獨立若秋胡之攢眉
凝金天之殺氣凜粉壁之雄姿紫銛劍戟爪握刀錐
群賓失席以聘貽未悟丹青之所為吾嘗恐出戶牖
以飛去何意終年而在斯

方城張少公廳畫師猛讚

張公之堂華壁照雪師猛在圖雄姿奮發森竦一作踈眉

目颯灑毛骨鋸牙銜霜鉤爪抱一作把月掣蹲胡以震怒

謂有夏之堯杌永觀厥容神駭不歇

羽林范將軍畫讚

羽林列衛壁壘南垣四十五星光輝至尊范公拜將
遙承主恩位寵虎臣封傳鴈門瞻天蹈舞踊躍精魂
逐逐鸚視昂昂鴻騫心豪祖述氣爽劉琨名震大國
威揚列藩麟閣之階粉圖華軒胡兵百萬橫行縱吞
爪牙帝室功業長存

金銀泥畫西方淨土變相讚并序

我聞金天之西日沒之所去中華十萬億刹有極樂
世界焉彼國之佛身長六十萬億常沙由旬眉間白
毫向右宛轉如五須彌山目光清白若四海水端坐說
法湛然常存沼明金沙岸列珍樹欄楯彌覆羅網周

張車渠瑠璃爲樓殿之飾頗黎碼碯耀階砌之榮皆
諸佛所證無虛言者金銀泥畫西方淨土變相蓋馮
翊郡秦夫人奉爲亡夫湖州刺史韋公之所建也夫
人蘊冰玉之清敷聖善之訓以伉儷大義希拯拔於
幽塗父子恩深用重脩於景福誓捨珍物構求名工圖
金創端繪銀設像八法功德波動青蓮之池七寶香
花光映黃金之地清風所拂如生五音百千妙樂咸
疑動作若已發願未及發願若已當生未及當生精
念七日必生其國功德罔極酌而難名讚曰

向西日沒處遙瞻大悲顏目淨四海水身光紫金山
勤念必往生是故稱極樂珠網珍寶樹天花散香閣

圖畫了在眼願託彼道場以此功德海冥祐爲舟梁
八十一劫罪如風掃輕霜庶觀無量壽長願玉毫光

江寧楊利物畫讚

太華高嶽三峯倚天洪波經海百代生賢爲夔爲龍
廓土濟川趙城開國王樹凌煙筆鼓元化形分自然
明珠獨轉秋月孤懸作宰作程摧剛挫堅德合窈冥
聲播蘭茝鴻漸麟閣英圖可傳

金鄉薛少府廳畫鶴讚

高堂閑軒兮雖聽訟而不擾圖蓬山之竒禽想瀛海
之矚眇紫頂煙施丹眸星皎昂昂欲飛一作霍若驚矯
形留座隅勢出天表謂長唳於風霄終寂立於露曉

凝翫益古俯察逾妍舞疑傾市聽似聞絃儻感至精
以神變可弄影而浮煙

誌公畫讚

水中之月了不可取虛空其心一作身寥廓無主錦幪鳥
爪獨行一作遊絕侶刀齊尺梁扇迷陳語丹青聖容何住
一作往何所

琴讚

嶧陽孤桐石聳天骨根老冰泉葉苦霜月斲為綠綺
徽聲粲發秋風入松萬古竒絕

朱虛侯讚

嬴氏穢德金精摧傷秦鹿克獲漢風飛揚赤龍登天

白日昇光陰虹賊虐諸呂擾攘朱虛來歸會酌高堂
雄劔奮擊太后震惶爰鋤產祿大運乃昌功冠帝室
于今不亡

觀飲飛斬蛟龍圖讚

飲飛斬長蛟遺圖畫中見登舟既虎嘯激水方龍戰
驚波動連山拔劔曳雷電鱗摧白刃下血染滄江變
感此壯古人千秋一作載若對面

地藏菩薩讚 并序

太雄掩照日月崩落惟佛智慧大而光生死雪賴假
普慈力能救無邊苦獨出曠劫道守開橫流則地藏菩
薩為當仁矣弟子扶風竇滔少以英氣爽邁結交王

俟清風豪俠極樂生疾乃得惠劍於真宰湛本心於
虛空願圖聖容以祈景福庶冥力憑助而厥苦有瘳
爰命小才式讚其事讚曰

本心若虛空清淨無一物焚蕩淫怒癡圓寂了見佛
五綵圖聖像悟真非妄傳掃雪萬病盡爽然清涼天
讚此功德海永為曠代宣

魯郡葉和尚讚

海英嶽靈誕彼開士了身皆空觀月在水如薪傳火
朗徹生死如雲開天廓然萬里寂滅為樂江海而閑
逆旅形內虛舟世間邈彼崑閬誰云可攀

李太白文集卷第二十八

吳齋繆晷武子甫重刊宋本

李太白文集卷第二十九

頌

學士贈右拾遺李白

趙公西候亭頌

崇明寺佛頂尊勝陀羅尼幢頌

銘

化城寺大鐘銘并 天門山銘

記

任城縣廳壁記

趙公西候新亭頌

惟十有四載皇帝以歲之驕陽秋五不稔乃慎擇明
牧恤南方凋枯伊四月孟夏自淮陰遷我天水趙公
作藩于宛陵祇明命也惟公代秉天憲作保南臺洪

柯大本聿生懿德宜乎哉橫風霜之秀氣鬱王霸之
竒略初以鐵冠白筆佐我燕京威雄振肅虜不敢視
而後鳴琴二邦天下取則起草三省朝端有聲天子
識面宰衡動聽殷南山之雷剖赤縣之劇強項不屈
三州所居大化咸列碑頌至於是邦也酌古以訓俗
宣風以布和平心理人兵鎮唯靜畫一千里時無莠
言退公之暇清眺原隰以此郡東塹巨海西襟長江
咽三吳扼五嶺輻軒錯出無自時而息焉出自西郭
蒼然古道道寡列樹行無清陰至有疾雷破山狂飈
震壑炎景爍野秋霖灌途馬逼側於谷口人周章於
山頂亭候靡設逢迎闕如自唐有天下作牧百數因

循齷齪罔恢永圖及公來思大革前弊實相此土陟
降觀之壯其迴崗龍盤沓嶺波起勝勢交至可以有
作方農之隙廓如是營遂鏟崖坦堙卑驅石剪棘削
污壤堦高隅以門以墉乃棟乃宇儉則不陋麗而不
奢森沉閉閤燥濕有庇若鳧之勇如鵬斯騫縈流鏡
轉涵映池底納遠海之餘清瀉蓮峯之積翠信一方
雄勝之郊五馬踟躕之地也長史齊公光又人倫之
師表司馬武公幼成衣冠之髦彥錄事參軍吳鎮宣
城令崔欽令德之後良材間生縱風教之樂地出人
倫之高格卓絕映古清明在躬僉謀儔功不日而就
揔是役也伊二公之力歟過客沉吟以稱嘆邦人聚

舞以相賀僉曰我趙公之亭也群寮獻議請因謠頌以名之則必與謝公北亭同不朽矣白以爲謝公德不及後世亭不留要衝無勿拜之言鮮登高之賦方之今日我則過矣敢詢耆老而作頌曰
眈眈高亭趙公所營如鼇背突兀於太清如鵬翼開張而欲行趙公之宇千載有覩必恭必敬爰遊爰處瞻而思之罔敢大語趙公來翔有禮有章煌煌鏘鏘如文翁之堂清風洋洋永世不忘

崇明寺佛頂尊勝陀羅尼幢頌 并序

共工不觸山媧皇不補天其洪波汨汨流伯禹不治水萬人其魚乎禮樂大壞仲尼不作王道其昏乎而

有功包陰陽力掩造化首出衆聖卓稱大雄彼三者之不足徵矣粵有我西方金僊之垂範覺曠劫之大夢碎群愚之重昏寂然不動湛而常存使苦海靜滔天之波疑山滅炎崑之火囊括天地置之清涼日月或墜神通自在不其偉歟魯郡崇明寺南門佛頂尊勝陀羅尼石幢者蓋此都之壯觀昔善住天子及千大天遊于園觀又與天女遊戲受諸快樂即於夜分中聞有聲曰善住天子七日滅後當生七反畜生之身於是如來授之吉祥真經遂脫諸苦蓋之天徵爲大法印不可得而聞也我唐高宗時有窳賓桑門持入中土猶曰藏大寶清園虛空檀金淨彩人皆悅見

所以山東開士舉國而崇之時有萬商投珍士女雲
會衆布蓄魯魯如陵琢文石於他山聳高標於列肆鏡
珉錯綵爲鯨爲螭天人海恠若叱若語貝葉金言刊
其上荷花水物形其隅良工草萊獻技而去聖君垂
拱南面穆清而居大明廣運無幽不燭以天下所立
茲幢多臨諸旗亭喧囂湫隘本非經行網繞之所乃
頒下明詔令移於寶坊吁百尺中標矗若雲斷委翳
苔蘚周流星霜俾龍象興嗟仰瞻無地良可嘆也我
太官廣武伯隴西李公先名琬奉詔書改爲輔其從
政也肅而寬仁而惠五鎮方牧聲聞于天帝乃加剖
竹于魯魯道粲然可觀方將和陰陽於太階致君於

堯舜豈徒閉閣坐嘯鴻盤二千哉乃再崇厥功發揮
象教於是與長史盧公司馬李公等咸明明在公綽
綽有裕韜大國之寶鐘元精之和榮兼半刺道光列
嶽才或大而用小識無微而有通政其有經談豈更
僕有律師道宗心惣群妙量苞大千日何瑩而常明
天不言而自運識岸浪注玄機清發每口演金偈舌
搖電光開關延敵罕有當者由萬竅同號於一風衆
流俱納於溟海若乃嚴飾佛事規矩梵天法堂鬱以
霧開香樓岌乎島峙皆我公之締構也以天寶八載
五月一日示滅大寺百城號天四衆泣血焚香散花
扶襯卧轍仙鶴數十飛鳴中絕非至德動天深仁感

物者其孰能與於此乎三綱等皆論窮彌天惠湛清
月傳千燈於智種了萬法於真空不謀同心克樹聖
跡太官李公乃命門於南垣廟通衢曾盤舊規累構
餘石壯士加勇力侔拔山纔擊鼓以雷作拖鴻縻而
電掣千人壯萬夫勢轉鹿盧於橫梁泯環合而無際
常六合之振動崛九霄之崢嶸非鬼神功曷以臻此
況其清景燭物香風動塵群形所霑積苦都雪粲星
辰而增輝挂文字而不滅雖漢家金莖伏波銅柱擬
茲陋矣或日月圓滿方檀散華清心諷持諸佛稱贊
夫如是亦可以從一天至一天開天宮之門見群聖
之顏巍巍功德不可量也其錄事叅軍六曹英寮及

十一縣官屬有宏才碩德含香繡衣者皆列名碑陰
此不具載郡人都水使者宣道先生孫太冲得真人
紫葉玉笈之書能令太一神自成還丹以獻于帝帝
服享萬壽與天同休功成身退謝病而去不謂古之
玄通微妙之士歟乃謂白曰昔王文考觀藝於魯騁
雄辭於靈光陸佐公知名在吳銘雙闕於盤石吾子
盍可羨盛德揚中和恭承話言敢不惟命遂作頌曰
揭高幢兮表天宮疑獨出兮凌星虹神縱縱兮來空
仵扶傾兮蒼穹西方大聖稱大雄橫絕苦海舟群蒙
陀羅尼藏萬法宗善住天子獲厥功明明李君牧東
魯再新頽規扶衆苦如大雲王注法雨邦人清涼喜

聚舞揚鴻名兮振海浦銘豐碑兮昭萬古

化城寺大鐘銘 并序

噫天以震雷鼓群動佛以鴻鐘驚大夢而能發揮沉
潛開覺茫蠢則鐘之取象其義博哉夫揚音大千所
以清真心警俗慮協響廣樂所以達元氣彰天聲銘
勲皇宮所以旌豐功昭茂德莫不配美金鼎增輝寶
坊仍事作制豈徒然也粵有唐宣城郡當塗縣化城
寺大鐘者量函千盈蓋邑宰李公之所勅也公名有
則系立元之英蕤茂列聖之天枝生于公族貴而秀
出少蘊才略壯而有成西逾流沙立功絕域帝疇乎
厥庸始學古從政歷宰潔白聲聞于天天書褒榮輝

之簡牘稽首三復子孫其傳天寶之初鳴琴此邦不言
而治日計之無近功歲計之有大利物不知化潛臻
小康神明其道越不可尚方入于禪關覩天宮崢嶸
聞鐘聲瑣屑乃謂諸龍象曰盍不建大法鼓樹之層
臺使群聾六時有所歸仰不亦美乎於是發一言以
先覺舉百里而感應秋毫不挫人多子來銅崇朝而
山積工不日而雲會乃採鳧氏撰鳴鐘火天地之爐
扇陰陽之炭回祿奮怒飛廉震驚金精轉潛以融熠
銅液星縈而燿燦光噴日道氣敵天維紅雲點於太
清紫煙矗於遙海烜赫宇宙功侔鬼神瑩而察之吁
駭人也爾其龍質炳發虎形躩踞縻金索以上絙懸

寶樓而迭擊手傍振萬壑高聞九天聲動山以隱隱響
奔電而闐闐赦湯鑊於幽途息劔輪於苦海景福胎
嚮被于人天非李公好謀而成弘濟群有孰能興於
此乎丞尉等並衣冠之龜龍人物之標準大雅君子
同僚盡心聞善賈勇贊成厥美寺主昇朝閑心古容
英骨秀氣洒落毫素謙柔笑言海受水而皆納鏡無
形而不燭直道妙用乃如是然常虛懷忘情潔已利
物是人行空寂不動見如來有若上座靈隱都維那
則舒名僧日暉蘊虛常因調護賢哉六開士普聞八
萬法深入禪惠精修律儀將博我以文章求我以述
作功德大海酌而難名遂與六曹豪吏姑熟賢老乃

緇乃黃鳧趨梵庭請揚宰君之鴻美白昔忝侍從備
于辭臣恭承德音敢闕清風之頌其辭曰
雄雄鴻鐘砰隱天雷鼓霆擊警大千含號烜赫聲無
邊摧憚魑魅招靈仙傍極六道極九泉劔輪輟苦期
息肩湯鑊猛火停熾燃愷悌賢宰人父母興功利物
信可久德方金鐘永不朽

天門山銘

梁山博望關扃楚濱夾據洪流寔爲吳津兩坐錯落
如鯨張鱗惟海有若唯川有神牛渚怪物目圍車輪
光射島嶼氣凌星辰卷沙揚濤溺馬殺人國泰呈瑞
時訛返珍開則九江納錫閉則五嶽飛塵天險之地

無安匪親

任城縣廳壁記

風姓之後國爲任城蓋古之秦縣也在禹貢則南徐之分當周成廼東魯之邦自伯禽到于順公三十二代遭楚蕩滅因屬楚焉炎漢之後更爲郡縣隋開皇三年廢高平郡移任城於舊居邑乃屢遷并則不改魯境七百里郡有十一縣任城其衝要東盤琅邪西控鉅野北走厥國南馳互鄉青帝太昊之遺墟白衣尚書之舊里土俗古遠風流清高賢良間生掩映天下地博厚川踈明漢則名王分茅魏則天人列土所以代變豪侈家傳文章君子以才雄自高小人則鄙

朴難治況其城池爽塏邑屋豐潤香閣倚日凌丹霄而欲飛石橋橫波驚彩虹而不去其雄麗垓北有如此焉故萬商往來四海縣歷實泉貨之橐籥爲英髦之咽喉故資大賢以主東道制我美錦不易其人今鄉二十六戶一萬三千三百七十一帝擇明德以賀公宰之公溫恭克修儼實有立季野備四時之氣士元非百里之才撥煩彌閑剖劇無滯鎔百發克破於楊葉刀一鼓必合於桑林寬猛相濟弦韋適中一之歲肅而教之二之歲惠而安之三之歲富而樂之然後青衿向訓黃髮履禮耒耜就役農無游手之夫杼軸和鳴機罕頰蛾之女物不知化陶然自春權豪鋤

縱暴之心黠吏返淳和之性行者讓於道路任者併
於輕重扶老攜幼尊尊親親千載百年再復魯道非
神明博遠孰能契於此乎白探竒東蒙竊聽輿論輒
記於壁垂之將來俾後賢之操刀知賀公之絕跡者
也

李太白文集卷第二十九

吳門繆崑武字甫重刊宋本

李太白文集卷第三十

碑

學士贈右拾遺李白

比干碑

天長節使鄂州刺史韋公德政碑 并序

溧陽瀨水貞義女碑銘 并序

武昌宰韓君去思碑 并序

虞城縣令李公去思頌碑 并序

文

為竇氏小師祭璿和尚文

為宋中丞祭九江文

比干碑

太宗文皇帝既一海內明君臣之義貞觀十九年征
島夷師次殷墟乃詔贈少師比干爲太師謚曰忠烈
公遣大臣持節弔祭申命郡縣封墓葺祠置守冢以
少牢時享著於甲令刻於金石故比干之忠益彰臣
子得述其志昔商王受毒痛於四海悖于三正肆厥
淫虐下罔敢諍於是微子去之箕子囚之而公獨死
之非夫捐生之難處死之難故不可死而死是輕其
生非孝也可死而不死是重其死非忠也王曰叔父
親其至焉國之元臣位莫崇焉親不可以觀其危昵
不可以忘其祖則我臣之業將墜于泉商王之命將
絕于天整扶其顛遂諫而死剖心非痛止殷爲痛公

之忠烈其若是焉故能獨立危邦橫抗興運周武以
三分之業有諸侯之師實其十亂之謀揔其一心之
衆當公之存也乃戢彼西土及公之喪也乃觀乎孟
津公存而殷存公喪而殷喪興亡兩繫豈不重歟且
聖人立教懲惡勸善而已矣人倫大統父子君臣而
已矣少師存則垂其統歿則垂其教奮乎千古之上
行乎百王之末俾夫淫者懼佞者慙義者思忠者勸
其爲戒也不亦大哉而夫子稱殷有三仁是豈無微
言嘗敢頤之曰存其身存其宗亦仁矣存其名存其
祀亦仁矣亡其身圖其國亦仁矣若進死者退生者
狂狷之士將奔走之褒生者貶死者宴安之人將寘

力焉故同歸諸仁各順其志殊塗而一揆異行而齊
致俾後人優柔而自得焉蓋春秋微婉之義必將建
皇極立彝倫闢在三之門垂不二之訓以明知于世
則夫人臣者既移孝於親而致之於君焉有聞親失
而不諍親危而不救從容安地而自得甚哉不然矣
夫孝於其親人之親皆欲其子忠於其主人之主皆
欲其臣故歷代帝王皆欲精顯周武下車而封其墓
魏武南遷而創其祠我太宗有天下裡百神盛其禮
追贈太師謚曰忠烈申命郡縣封墳葺祠置守冢五
家以少牢時享著于甲令刻于金石於戲哀傷列辟
主君封德正與神明秩視郡王身滅而榮益大世絕

而祀愈長然後知忠烈之道激天感人深矣天寶十
祀余尉于衛拜首祠堂魄感精動而廟在鄰邑官非
式閭斲石銘表以誌丕烈銘曰

縻軀非仁蹈難非智死於其死然後爲義忠無二軀
烈有餘氣正直聰明至今猛視咨爾來代爲臣不易

天長節使鄂州刺史韋公德政碑并序

太虛旣張惟天之長所以白帝真人當高秋八月五
日降西方之金精採天長爲名將傳之無窮紀聖誕
之節也我高祖創業太宗成之三后繼統王猷如一
大盜間起開元中興力倍造化功包天地不然何能
遏犧農之頽波返淳朴於太古雖軒后至道由聞蚩

尤之師今網漏吞舟而胡夷起於轂下先天文武孝
感皇帝越在明兩揔戎扶風正帝車於北斗拯橫流
於鯨口迴日轡於西山拂蒙塵於帝顏呼吸而收兩
京烜赫而安六合歷列辟而罕匹顧將來而無儔太
陽重輪合耀並出宇宙翕變草木增榮一麾而靜妖
氛成功不處五讓而傳劔璽德冠樂推於戲昔堯及
舜禹皆無聖子審曆數去已終大寶假人飾讓以成
千載之美未若以文明鴻業受之元良與天同休相
統億祀則我唐至公而無私越三聖而殊軌騰萬人
之喜氣爛八極之祥雲上皇思汾陽而高蹈解負重
於吾君能事斯畢與人更始乃展祀郊廟望秩山川

方掩骼於河洛弔人於幽燕但誅元兇不問小罪噫
大塊之氣歌炎漢之風雲滂洋雨汪濊淥渥澤除瑕
類削平國步改號乾元至矣哉其雄圖景命有如此
者我邦伯韋公大彭之洪胤扶陽之貴族雄略邁古
高文變風運當一賢才堪三事歷職剖劇能聲旁流
衣繡而白筆橫冠分符而彤襜入境曩者永王以天
人授鉞東巡無名利劔承喉以脅從壯心堅守而不
動房陵之俗安於太山休弈列郡去若始至帝召岐
下深嘉直誠移鎮夏口救時艱也慎厥職康乃人減
兵歸農除害息暴大水滅郭洪霖注川人見憂於魚
鼈岸不辨於牛馬公乃抗辭正色言于城隍曰若一

日雨不歇吾當伐喬木焚清祠精心感動其應如響
無何中使銜命常祈名山廣徵牲牢驟欲致祭公又
盱衡而稱曰今主上明聖懷於百靈此淫昏之鬼不
載祀典若煩國禮是荒巫風其秉心達識皆此類也
物不知化如登春臺有若江夏縣令薛公揖四豪之
風當百里之寄幹蠱有立含章可貞遵之典禮恤疲
於和樂政其成也臻於小康中京重覩於漢儀列郡
還聞於舜樂選鄂之勝帳于東門乃登函歌擊土鼓
祀蓐收迎田祖招搖迴而大火乃落閭闔啓而涼風
始歸笙竽和籥之音象星辰而迭奏吳楚巴渝之曲
各土風而備陳禮容有穆簪笏列序羅衣蛾眉立乎

玳筵之上班劍虎士森乎翠幕之前千變百戲分曹
賈勇藺子跳劍迭躍流星之輝都盧尋撞倒挂浮雲
之影百川繞郡落天鏡於江城四山入牖照霜空之
海色獻觴醉於晚景舞袖紛於廣庭鶴髮之叟鴈序
而進曰恭聞天子無戲言恐轉公以大用老父不畏
死願留公以上聞悅坐棠而食風庶刻石以寘美白
觀樂入楚聞韶在齊採諸行謠遂作頌曰

爽朗太白雄光下射崢嶸金天華嶽旁連降精騰氣
赫矣昭然誕聖五日垂休萬年孽胡挺災大人有作
雷霆發揚攬搶乃落九服交泰五雲縈薄掃雪屯蒙
洗清寥廓軒后訪道來登峨嵋上皇西去異代同時

六龍轉駕兩曜迴規重遭唐主更覩漢儀肅肅韋公
大邦之翰秀骨嶽立英謀電斷宣風樹聲遠威逆亂
不長不極樂奏爭觀九劔揮霍魚龍屈盤東迴舞袖
西笑長安頌聲載路豐碑是刊

溧陽瀨水貞義女碑銘

皇唐葉有六聖再造八極鏡照萬方幽明咸熙天秩
有禮自太古及今君君臣臣烈士貞女采其名節尤
彰可激清頹俗者皆掃地而祠之蘭蒸椒漿歲祀罔
缺而茲邑貞義女光靈翳然埋冥古遠琬琰不刻豈
前脩博達者爲邦之意乎貞義女者溧陽黃山里史
氏之女也以家溧陽史闕書之歲三十弗移天于人

清英潔白事母純孝手柔荑而不龜身擊漂以自業
當楚平王時平王虐忠助讒苛虐厥政芟於尚斬於
奢血流于朝赤族伍氏怨毒於人何其深哉子胥始
東奔勾吳月涉星遁或七日不火傷弓于飛逼迫於
昭關匍匐於瀨渚捨車而徒告窮此女目色以臆授
之壺漿全人自沉形與口滅卓絕千古聲凌浮雲激
節必報之讎雪誠無疑之地難乎哉借如曹娥潛波
理貫於孝道聶姊殞肆槩動於天倫魯姑棄子以却
三軍之衆漂母進飯沒受千金之恩方之於此彼或
易爾卒使伍君開張闔閭傾蕩鄢郢吳師鞭屍於楚
國申胥泣血於秦庭我亡爾存亦各壯志張英風於

古今雪大憤於天地微此女之力雖云爲之士焉能
咆哮烜赫施於後世也望其溺所愴然低迴而不能
去每風號吳天月苦荆水響像如在精魂可悲惜其
投金有泉而刻石無主哀哉邑宰滎陽鄭公名晏家
康成之學世子產之才琴清心閑百里大化有若主
簿扶風竇嘉賓縣尉廣平宋陟丹陽李濟南朝陳然
清河張昭皆有卿才霸略同事相協緬紀英淑勒銘
道周雖陵頽海竭文或不死其辭曰

粲粲貞女孤生寒門上無所天下報母恩春風三十
花落無言乃如之人激漂清源碧流素手縈彼潺湲
求思不可秉節而存伍胥東奔乞食於此女分壺漿

滅口而死聲動列國義形壯士入郢鞭屍還吳雪恥
投金瀨汜報德稱美明明千秋如月在水

武昌宰韓君去思頌碑

仲尼大聖也宰中都而四方取則子賤大賢也宰單
父人到于今而思之乃知德之休明不在位之高下
其或繼之者得非韓君乎君名仲卿南陽人也昔延
陵知晉國之政必分於韓獻子雖不能遏屠岸之誅
存孤嗣趙太史公稱天下陰德也其賢才羅生列侯
十世不亦宜哉七代祖茂後魏尚書令安定王五代
祖鈞金部尚書曾祖駿銀青光祿大夫雅州刺史祖
泰曹州司馬考睿素朝散大夫桂州都督府長史分

茅納言剖符佐郡奕葉明德休有烈光君乃長史之
元子也妣有吳錢氏及長史即世夫人早孀弘聖善
之規成名四子文伯孟軻二母之儔歟少卿當塗縣
丞感槩重諸死節於義雲卿文章冠世拜監察御史
朝廷呼爲子房紳卿尉高郵才名振耀幼負美譽君
自潞州銅鞮尉調補武昌令未下車人懼之既下車
人悅之惠如春風三月大化姦吏束手豪宗側目有
爨王者三江之巨橫白額旦去清琴高張兼操刀永
興二邑同化時鑿齒磨牙而兩京宋城易子而炊骨
吳楚轉輸蒼生熬然而此邦晏如襁負雲集居未二
載戶口三倍其初銅鐵曾青未擇地而出太冶鼓鑄

如天降神既烹且爨數盈萬億公私其賴之官絕請
託之求吏無絲毫之犯本道採訪大使皇甫公侁聞
而賢之擢佐輶軒多所弘益尚書右丞崔公禹稱之
於朝相國崔公渙特奏授鄱陽令兼攝數縣所謂投
刃而皆虛爲其政而則理成去若始至人多懷恩新
宰王公名庭璘巖然太華浼然洪河含章可貞幹蠱
有立接武比德絃歌連聲服美前政聞諸耆老與邑
中賢者胡思泰一十五人及諸寮吏式歌且舞願揚
韓公之遺美白採謠刻石而作頌曰
峨峨楚山浩浩漢水黃金之車大吳天子武昌鼎據
寔爲帝里時躋世訛薄俗如燬韓君作宰撫茲遺人

滂注王澤猶鴻得春和風潛暢惠化如神刻石萬古
永思清塵

虞城縣令李公去思頌碑并序

王者立國君人聚散六合咸土以百里雷其威聲華
其俗而風之漁其人而涵之其猶衆鮮洋洋樂化在
水波而動之則憂頽尾之刺作焉徐而清之則安頌
首之頌興焉苟非大賢孰可育物而能光昭絃歌卓
立振古則有虞城宰公焉公名錫字元勳隴西成紀
人也高祖楷隋上大將軍縣益原三州刺史封汝陽
公曾祖騰雲皇朝廣茂二州都督廣武伯祖立節起
家韓王府記室叅軍襲廣武伯父浦郢海淄唐陳五

州刺史魯郡都督廣平太守襲武伯皆納忠王庭名
鏤鐘鼎俟伯繼跡故可略而言焉公即廣武伯之元
子也年十九拜北海壽光尉心不挂細務口不言人
非群吏罕測望風竒憚秩滿轉右武衛倉曹叅軍次
任趙郡昭應縣令奉詔修建初啓運二陵摠徒五郡
支用三萬貫舉築雷野不鞭一人功成餘八千貫其
幹能之聲大振乎齊趙矣時名卿巡按陵有黃赤氣
上衝太微散爲慶雲數千處蓋精勤動天地也如此
因粉圖奏名編入國史天寶四載拜虞城令而天章
寵榮俾金玉王度罔若七耀昭回堂隅於戲竒之哉
宸威臨顧作訓以理其俗魯而木舒而徐急則很戾

緩則鳥散公酌以鈞道和之琴心于是安四人敷五
教處必糲食行惟單車觀其約而吏儉仰其敬而俗
讓激直士之素節揚廉夫之清波三月政成鄰境取
則因行春見枯骸于路隅惻然疚懷出俸而葬由是
百里掩骸四封歸仁有居喪行號城市者習以成俗
公勗之親鄰厄以凶事而鰥寡惇獨衆所賴焉可謂
變其頽風永錫爾類先時邑中有聚黨橫猾者實惟
二耿之族幾百家焉公訓爲純人易其里曰大忠正
之里北境黎丘之古鬼焉或醉父以刃其子自公到
職夢聞爲災官宅舊井水清而味苦公下車嘗之莞
爾而笑曰旣苦且清足以符吾志也遂汲用不改變

爲甘泉蠡丘館東有三柳焉公往來憇之飲水則去
行路勿剪比于甘棠鄉人因樹而書頌四十有六篇
惟公志氣塞乎天地德音發乎聲容縞乎若寒崖之
霜湛乎若清川之月彈惡雪善速若箭飛尤能筆工
新文口吐雅論天下美士多從之遊非汝陽三公三
伯之積德則何以生此邑之賢老劉楚瓌等乃相謂
曰我李公以神明之化大賴于虞人虞人陶然歌詠
其德官則敬去則思山川鬼神猶懷之況于人乎乃
咨群寮與去思之頌縣丞王彥暹貢外丞魏陟主簿
李誥縣尉李向趙濟盧榮等同德比義好謀而成相
與採其瓌蹤茂行俾刻石篆美庶清風令名奮乎百

世之上其詞曰

激揚之水兮白石有鑿李公之來兮雪虞人之惡厥
德孔昭折獄既清五教大行彤雲雷之聲既父其父
又子其子春之以風化成草靡乃影我崗乃雨我田
陽無驕憊四載有年人戴公之賢猶百里之天棄余
往矣茫茫如墜川哀喪惠博掩骼仁深苦井變甘兇人
易心三柳勿剪永思清音

為竇氏小師祭璿和尚文

年月日某謹以齋蔬之奠敢昭告于和尚之靈伏惟
和尚降靈自天依化遊世角立獨出嶷然生知鳳凰
開九包之翼豫章橫萬頃之陂始傳燈而納照因落

髮以從師邁龍象以蹴踏為天人之羽儀紹釋風於
西域迴佛日於東維若大塊之噫氣鼓和風而一吹
熱惱清灑道芽榮滋走吳楚以宗仰將掃地而歸之
嗚呼來無所從去復何適水還火歸蕭散本宅寶舟
輟棹禪月掩魄痛一往而無蹤愴雙林之變白某早
承訓誨偏荷恩慈忝餐風於法侶旋落蔭於禪枝號
無輟響泣有餘悲手撰茗藥精誠嚴思異神道之昭
格庶明靈而饗之

為宋中丞祭九江文

謹以三牲之奠敬祭于長源公之靈惟神包括乾坤
平準天地劃三峽以中斷疏九道以爭奔綱紀南維

朝宗東海牲玉有禮祀典無虧今萬乘蒙塵五陵慘
黷蒼生悉為白骨赤血流於紫宮宇宙倒懸攬搶未
滅含識結憤思剪元兇若思叅列雄藩各當重寄遵
奉天命大舉天兵照海色於旌旗肅軍威於原野而
洪濤渤海狂飈振驚惟神使陽侯卷波羲和奉命樓
船先濟士馬無虞掃妖孽於幽燕斬鯨鯢於河洛惟
神祐我降休于民敬陳精誠庶垂歆饗

李太白文集卷第三十

吳門繆是武子甫重刊宋本

李太白文集後序

唐李陽冰序李白草堂集十卷云當時著述十喪其
九咸平中樂史別得白歌詩十卷合為李翰林集二
十卷凡七百七十六篇史又纂雜著為別集十卷治
平元年得王文獻公溥家藏白詩集上中二帙凡廣
二百四篇惜遺其下帙熙寧元年得唐魏萬所纂白
詩集二卷凡廣四十四篇因哀唐類詩諸編洎刻石
所傳別集所載者又得七十七篇無慮千篇公舊目
而釐正其彙次使各相從以別集附於後凡賦表書
序碑頌記銘讚文六十五篇合為三十卷同舍呂縉
叔出漢東紫陽先生碑而殘缺間莫能辨不復收云

夏五月晦常山宋敏求題

李白集三十卷舊歌詩七百七十六篇今千有一篇雜著六十五篇者知制誥常山宋敏求字次道之所廣也次道既以類廣白詩自爲序而未考次其作之先後余得其書乃考其先後而次第之蓋白蜀郡人初隱岷山出居襄漢之間南游江淮至楚觀雲夢雲夢許氏者高宗時宰相圉師之家也以女妻白因留雲夢者三年去之齊魯居徂來山竹溪入吳至長安明皇聞其名召見以爲翰林供奉頃之不合去北抵趙魏燕晉西涉岐邠歷商於至洛陽游梁最久復之齊魯南游淮泗再入吳轉徙金陵上秋浦尋陽天寶

十四載安祿山反明年明皇在蜀永王璘節度東南白時卧廬山璘迫致之璘軍敗丹陽白奔亡至宿松坐繫尋陽獄宣撫大使崔渙與御史中丞宋若思驗治白以爲罪薄宜貫而若思軍赴河南遂釋白囚使謀其軍事上書肅宗薦白才可用不報是時白年五十有七矣乾元元年終以汙璘事長流夜郎遂汎洞庭上峽江至巫山以赦得釋憩岳陽江夏久之復如尋陽過金陵徘徊於歷陽宣城二郡其族人陽冰爲當塗令白過之以病卒年六十有四是時寶應元年也其始終所更涉如此此白之詩書所自叙可考者也范傳正爲白墓誌稱白偶乘扁舟一日千里或遇

勝景終年不移則見於白之自叙者蓋亦其略也舊史稱白山東人爲翰林待詔又稱永王璘節度揚州白在宣城謁見遂辟爲從事而新書又稱白流夜郎還尋陽坐事下獄宋若思釋之者皆不合於白之自叙蓋史誤也白之詩連類引義雖中於法度者寡然其辭閎肆雋偉殆騷人所不及近世所未有也舊史稱白有逸才志氣宏放飄然有超世之心余以爲實錄而新書不著其語故錄之使覽者得詳焉南豐曾鞏序

臨川晏公知止字處善守蘇之明年政成暇日出李翰林詩以授於漸曰白之詩歷世浸久所傳之集率多

訛缺予得此本最爲完善將欲鏤板以廣其傳漸切謂李詩爲人所尚以宋公編類之勤而曾公考次之詳世雖甚好不可得而悉見今晏公又能鏤板以傳使李詩復顯於世寔三公相與成始而成終也元豐三年夏四月信安毛漸校正謹題

後序

三



